

gesandt/ bey dieser Krieger Vnruhe aber mehrentheils/ wann was vorgangen/ zu Jhrer Churfürstl. Durchl. von Sachsen<sup>52</sup>/ den Hertzog von Friedland<sup>53</sup>/ General Tylli<sup>54</sup>/ vnd andern Keyserlichen vnd Königlichen hohen KriegesOfficieren/ wie auch auff den Tag zu Leipzig Anno 1631. verschickt worden/ da er dann jedesmahl seine sachen/ mit J. F. Gn. vnd der gesambten Herrschafft sonderbarem Contento verrichtet/ in abwendung oder milterung grosser vnd oft gedräweter Kriegspressuren, seiner gnädigen Herrschafft vnnnd dem gantzen Lande viel nützliche vnd getrewe Dienste geleistet/ Vmb welcher Ursache willen er Anno 1626. von der gesambten gnädigen Herrschafft in den Engern Außschuß beruffen worden/ da er jhme dann allewege die wiederbringung der Wohlfahrt vnser Fürstenthumbs vnd Stadt höchstes fleisses angelegen seyn lassen/ auch mehr auff den gemeinen Nutzen/ als Privat-Frommen gesehen/ vnd dessen Beförderung/ auch oft mit zusetzung seiner Gesundheit/ vngepartes fleisses gesucht: [...] Sonderlich ist an jhme zu verwundern gewesen/ daß wiewol er ein gelehrter vnd erfahrner Mann in Rechten/ [Kiiij r] Sprachen vnd allen andern guten Künsten gewesen/ daß er doch noch fast Tag vnd Nacht/ früe vnd spat/ so oft er sich nur von gemeinen vnd häußlichen geschäftten in etwas abmüssigen können/ mit lesung allerhand geistlichen vnd weltlichen/ alten vnd newen erbawlichen Bücher zubracht/ mit solcher begierde vnnnd vnverdrossem fleiß/ daß er nie kein Buch angefangen zu lesen/ welches er nicht zu Ende gebracht vnd außgelesen/ vnd kan ich jhme mit warheit nachrühmen/ daß er von der Zeit meiner anwesenheit mehr denn 80. der geringen Tractätlein zu geschweigē/ vornehme Autores/ vnter welchen von allerhand Materien/ als Politischen/ Philosophischen/ Historischen/ Medicinischen/ Juristischen/ insonderheit aber Theologischen/ durch gelesen/ Dannenhero er auch eine solche geschickligkeit vnd wissenschaftt erlanget/ daß er mit den Theologis aus der H. Schrifft/ auch von den schweresten Streitpuncten disputiren/ mit den Jure Consultis, aus den Institutionibus, Pandectis vnd Codice, mit den Medicis aus der Medicin, mit den Philosophis ex utraq̃ue tām Practica quàm Theoretica Philosophia, vnd Historicis aus den allgemeinen vnd besondern Geschichten/ vnd vornemblich/ welche sich von vnser Väter biß auff diese Zeit her zugetragen/ mit grossem Ruhm vnd Lob/ fertig vnd erbawlich discurriren, vnd auch wol den Fürnembsten einer jeden facultet ein sattsames gnügen mit höchster verwunderung thun können/ dabey er dann seine grosse Dexteritet, fürtreffliches judicium, natürliche scharffsinnigkeit vnd vngläubliches Gedächtnüs/ zu männigliches belieben/ in viel wegen verspüren vnd sehen lassen/ daß man wol von jhme sagen kan/ was dort von dem furnehmen Juristen Juliano gerühmet wird: Ob ich schon einen Fuß im Grabe hette/ so wolte ich doch nicht ablassen zu lernen. [...]

[Li r] Anlangend seinen Ehestand vnd Häußliches wesen/ so hat er/ nach dem er seyn 40. Jahr erreicht/ nach einer anmutigen Heyrath getrachtet/ vnd mit sonderbahren vorbewust vnnnd gnädiger einwilligung/ Deß Durchläuchtigen Hochgebornen Fürsten vnnnd Herren/ Herrn Johann Georgen/ Fürsten zu Anhalt/ etc. Als seines Gnädigen Fürsten vnd Herrn/ wie auch der Durchläuchtigen Hochgebornen Fürstin vnnnd Frawen/ Frawen Dorothea/ Fürstin zu Anhalt/ Pfälzgräffin bey Rheyn/ Hertzogin in Beyern/ etc. Christmilden An-